

書名 白氏文集七十一卷 元和中那波道圓活字印
 本
 撰者 唐 白居易 撰
 卷 卷六十一
 內容分類 集 別集 唐五代 中唐
 叢書號 貴重- 36
 編號 D7163600

卷六十

白氏文集卷第一

諷諭一 古調詩五言 九六十五首

怨兩詩

皇帝嗣寶曆元和三年冬自冬及春暮不

雨旱蟪々上心念下民懼歲成災凶遂下

罪已聖殷勤告萬邦帝曰予一人繼天承

祖宗勤不遑寧夙夜心忡々元年誅劉

巴邛二年戮李錡不戰安江東

德邊有魏々功或者天降沴無



惟色首頁1
 東洋文化研究所漢籍目錄 編號: D7163600
 東洋文化研究所漢籍目錄所藏漢籍善本文影像資料庫 叢書號: 貴重- 36
 漢籍善本文影像資料庫文本文白氏文集七十一卷 元和中那波道圓活字印本
 版權所有: 東京大學東洋文化研究所
 使用上的注意事項

白氏文集卷第五十九

白氏文集卷第六十

碑序解祭文記 凡十二首

饒州刺史吳府君神道碑

蘇州石壁經碑

池上篇序

因繼集重序

劉白唱和集解

祭韋司空文

祭郎中弟文

祭李司徒文

祭元相微之文

長城縣令贈戶部侍郎崔君神道碑銘
泗州開元寺明遠大師塔碑銘 并序
東都聖善寺智和尚茶毗幢記

故饒州刺史吳府君神道碑銘 并

序

汨市朝溺妻子非達也囚山林擯血屬亦
非達也若有人與群動處一代間彼爲彼

我爲我不自潔不自污不巢許不伊呂水
其心雲其身浮沈消息無往而不自得者
其達人乎吾友吳君從事於斯矣君諱丹
字真存太子通事舍人覽之曾孫睦州司
馬庶之孫太子宮門郎贈工部尚書詮之
長子以進士第入官官歷正字協律郎大
理評事監察殿中侍御史太子舍人水部
庫部員外郎都官駕部郎中諫議大夫大
理少卿饒州刺史職歷義成軍節度推官

製 複 許 不

NOT TO BE REPRODUCED

東京大学東洋文化研究所

浙西道節度判官潼關防禦判官鎮州宣慰副使甄函使階至中大夫勲至上柱國讀書數千卷著文數萬言寶曆元年六月某日薨于饒州官次其年十一月某日葬于常州晉陵縣仁和鄉北原從遺志也君生四五歲弄泥沙時所作戲輒象道家法事八九歲弄筆硯時所出言輒類詩家篇章不自知其然蓋宿集儒玄之業明矣旣冠喜道書奉真錄每專氣入靜不粒食者

累歲顥氣充而丹田澤飄然有出世心旣壯在家爲長屬有三幼第八稚姪嗷嗷慄慄不忍見其飢寒慨然有干祿意乃曰肥遁不可以立訓吾將業儒以馳名名競不可以恬神吾將體玄以育德凍餒不可以安道吾將強學以徇祿祿位不可以多取吾將知足而守中繇是去江湖來京師求名得名求祿得祿身榮家給之外無長物無越思素琴在左黃庭在右澹乎自處與

天和始終履仕途二十七年享壽命八十
二歲無室家累無子孫憂屈伸寵辱委順
而已未嘗一日戚戚其心至于歸全反真
故予所謂達人之徒歟信矣仲弟湖州長
史某以予辱與其兄游既爲同門生又爲
同舍郎周知初終託爲碑紀噫先生之道
吾能引古以明之銘曰

漢中大夫 東方曼倩 夏侯湛高之
作廟貌讚 唐中大夫 真存先生

白樂天知之作神道銘 嗚呼二大夫
異代而同塗其皆達者乎

蘇州重玄寺法華院石壁經碑文

碑在石壁東次石壁在廣德法華院西南
偶院在重玄寺西若干步寺在蘇州城北
若干里以華言唐文譯刻釋氏經典自經
品衆佛號以降字加金焉夫開示悟入諸
佛知見以了義度無邊以圓教垂無窮莫
尊於妙法蓮華經凡六萬九千五百五言

證無生忍造不二門住不可思議解脫莫
極於維摩經凡二萬七千九十二言攝四
生九類入無餘涅槃實無得度者莫先於
金剛般若波羅蜜經凡五千二百八十七
言壞罪集福淨一切惡道莫急於佛頂尊
勝陀羅尼經凡三千二十言應念順願願
生極樂土莫疾於阿彌陀經凡一千八百
言用正見觀真相莫出於觀音普賢菩薩
法行經凡六千九百九十言詮自性認本

覺莫深於實相法密經凡三千一百五言
空法塵依佛智莫過於般若波羅蜜多心
經凡二百五十八言是八種經具十二部
合一十一萬六千八百五十七言三乘之
要旨萬佛之祕藏盡矣是石壁積四重高
三尋長十有五常厚尺有咫有石蓮敷覆
其上下有石神固護其前後火水不能燒
漂風日不能搖消所謂施無上法盡未來
際者也唐長慶二年冬作大和三年春成

律德沙門清晃矢厥謀青海繼厥志門弟子南容成之道則終之寺僧契元捨藝而書之郡守居易施詞而讚之讚曰佛涅槃後世界空虛惟是經典與衆生俱設有人書貝葉上藏檀龕中非堅非久如蠟印空假使人刺血爲墨剥膚爲紙即壞即滅如筆畫水噫畫水不若文石印蠟不若字金其功不朽其義甚深故吾謂石經功德契如來付囑之心

池上篇 并序

都城風土水木之勝在東南偏東南之勝在履道里里之勝在西北隅西開北垣第一第即白氏叟樂天退老之地地方十七畝屋室三之一水五之一竹九之一而島樹橋道間之初樂天旣爲主喜且曰雖有臺池無粟不能守也乃作池東粟廩又曰雖有子弟無書不能訓也乃作池北書庫又曰雖有賓朋無琴酒不能娛也乃作池

西琴亭加石樽焉樂天罷杭州刺史時得
天竺石一華亭鶴二以歸始作西平橋開
環池路罷蘇州刺史時得太湖石白蓮折
甃菱青板舫以歸又作中高橋通三島逕
罷刑部侍郎時有粟千斛書一車洎臧獲
之習箎磬絃歌者指百以歸先是頽川陳
孝山與釀法酒味甚佳博陵崔晦叔與琴
韻甚清蜀客姜發授秋思聲甚淡弘農楊
貞一與青石三方長平滑可以坐卧大和

三年夏樂天始得請爲太子賓客分秩於
洛下息躬於池上凡三任所得四人所與
洎吾不才身今率爲池中物矣每至池風
春池月秋水香蓮開之旦露清鶴唳之夕
拂楊石舉陳酒援崔琴彈姜秋思頽然自
適不知其他酒酣琴罷又命樂童登中島
亭合奏霓裳散序聲隨風飄或凝或散悠
揚於竹烟波月之際者久之曲未竟而樂
天陶然已醉睡於石上矣睡起偶詠非詩

非賦阿龜握筆因題石間視其粗成韻章
命爲池上篇云爾

十畝之宅五畝之園有水一池有竹千竿
勿謂土狹勿謂地偏足以容膝足以息肩
有堂有亭有橋有船有書有酒有歌有絃
有叟在中白鬚飄然識分知足外無求焉
如鳥擇木姑務巢安如鼃居坎不知海寬
靈鶴恠石紫菱白蓮皆吾所好盡在我前
時引一盃或吟一篇妻孥熙熙雞犬閑閑

優哉游哉吾將終老乎其間

因繼集重序

去年微之取予長慶集中詩未對答者五
十七首追和之合一百一十四首寄來題
爲因繼集卷之一今年復予以近詩五十
首寄去微之不踰月依韻盡和合一百首
又寄來題爲因繼集卷之二卷末批云更
棟好者寄來蓋示餘勇磨礪以須我耳予
不敢退舍即日又收拾新作格律詩共五

十首寄去雖不得好且以供命夫文猶戰也一鼓作氣再而衰三而竭微之轉戰迨茲三矣即不知百勝之術多多益辯耶抑又不知鼓衰氣竭自此爲遷延之役耶進退唯命微之微之走與足下和答之多從古未有足下雖少我六七年然俱已白頭矣竟不能捨章句拋筆硯何癖習如此之甚歟而又未忘少年時心每因唱酬或相侮詭忽忽自哂况他人乎因繼集卷且止

於三可也忽恐足下懶發不能成就至三前言戲之者姑爲巾幗之挑耳然此一戰後師亦老矣宜其橐弓匣刃彼此與心休息乎和晨興一章錄在別紙語盡於此亦不修書二年十月十五日樂天重序

劉白唱和集解

彭城劉夢得詩豪者也其鋒森然少敢當者予不量力往往犯之夫合應者聲同交爭者力敵一往一復欲罷不能繇是每製

一篇先相視草視竟則興作興作則文成一
二二年來日尋筆硯同和贈答不覺滋多
至大和三年春已前紙墨所存者凡一百
三十八首其餘乘興扶醉率然口號者不
在此數因命小姪龜兒編錄勒成兩卷仍
寫二本一付龜兒一授夢得小兒崙郎各
今收藏附兩家集予頃以元微之唱和頗
多或在人口常戲微之云僕與足下二十
年來爲文友詩敵幸也亦不幸也吟詠情

性播揚名聲其適遺形其樂忘老幸也然
江南士女語才子者多云元白以予子之
故使僕不得獨步於吳越間亦不幸也今
垂老復遇夢得得非重不幸耶夢得夢得
文之神妙莫先於詩若妙與神則吾豈敢
如夢得雪裏高山頭白早海中仙果子生
遲沉舟側畔千帆過病樹前頭萬木春之
句之類真謂神妙在在處處應當有靈物
護之豈唯兩家子姪祕藏而已巳酉歲三

白集卷十
月五日樂天解

祭中書韋相公文

維大和三年歲次己酉六月己酉朔三十日戊寅中大夫守太子賓客分司東都上柱國晉陽縣開國男食邑三百戶賜紫金魚袋白居易謹以茶果之奠敬祭于故中書侍郎平章事贈司空韋公德載惟公忠貞大節輔弼嘉謨倚注深恩哀榮盛禮伏見冊贈制中已詳惟公世祿官業家行士

風茂學清詞冲襟弘度伏見碑誌文中已詳此不重書但申夙願公佩服世教棲心空門外爲君子儒內修菩薩行常接餘論許追高蹤元和中出守開忠二郡日公先以喻金鑛偈相問往復再三繇是法要心期始相會合長慶初俱爲中書舍人日尋詣普濟寺宗律師所同受八戒各持十齋繇是香火因緣漸相親近及公居相位走在班行公府私家時一相見佛乘之外言

不及他誓趨菩提交相度脫去年臘月勝業宅中公云必結佛緣無如願力因自開經篋出大方廣佛華嚴經中十願品一通合掌焚香口讀手授云自持護始傳一人曾未經旬公即捐館追思覆視似不偶然今即日於道場齋心持念一願一禮如公在前以至他生不敢廢墜至若與公同科第聯官寮奉笑言蒙推獎窮通榮悴之感離合存歿之悲盡成虛空何足言歎今茲

薦真不設葷腥庶幾降臨鑒察精意噫浮生是幻真諦非空靈鷲山中既同前會兜率天上豈無後期嗚呼韋君先後聞耳伏惟尚饗

祭弟文

維大和二年歲次戊申十二月壬子朔三十日辛巳二十二哥居易以清酌庶羞之奠致祭于郎中二十三郎知退之靈日月不居新婦龜兒等豐酷如昨俯及歲暮奄

過大祥禮制云終追號永遠哀纏手足悲
裂肝心痛深痛深孤苦孤苦嗚呼自爾去
來再周星歲前事後事兩不相知今因奠
設之時粗表一一吾去年春授祕書監賜
紫今年春除刑部侍郎孤苦零丁又加衰
疾殆無生意豈有宦情所以僂俛至今待
終龜兒服制今已請長告或求分司即擬
移家盡居洛下亦是夙意今方決行養病
撫孤聊以終老合家除蘇蘇外並是通健

龜兒頗有文性吾每自教詩書三二年間
必堪應舉阿羅日漸成長亦勝小時吾竟
無兒窮獨而已茶郎叔母已下並在鄭滑
職事依前蘄蘄卿娘盧八等同寄蘇州免
至飢凍遙憐在符離莊上亦未取歸宅相
得彭澤場官各知平善骨兜石竹香鈿等
三人久經驅使昨大祥齋日各放從良尋
收膳娘新婦看養下邳楊琳莊今年買了
并造堂院已成往日亦曾商量他時身後

甚要新昌西宅今亦買訖爾前後所著文章吾自檢尋編次勒成二十卷題爲白郎中集嗚呼詞意書跡無不宛然唯是魂神不知去處每開一卷刀攪肺腸每讀一篇血滴文字擬憑崔二十四舍人譔序他日及吾文集同付龜羅收傳前年已來合家所造齋供功德皆領得否朔望晨夕嚮奠復嘗來無不論音容潛歿已久乃至夢寐相見全稀豈幽冥道殊莫苦拘礙將情爽

遷散杳無覺知不然何一去三年而茫昧若此吾今頭白眼暗筋力日衰黃壤之期亦應不遠但恐前後乖隔不知得見爾無下邳北村爾瑩之東是吾他日歸全之位神縱不合骨且相依豈戀餘生願畢此志嗚呼真筵將徹幃帳欲收此生之間豈有見日未死之際應無忘期仰天一號心骨破碎猶冀萬一聞吾此言痛心痛心千萬千萬尚饗

祭李司徒文

維大和四年歲次戊戌七月癸酉朔十九日辛卯中大夫守太子賓客分司東都上柱國賜紫金魚袋白居易內重表弟朝請大夫守少府監上柱國李翱謹以清酌庶羞之真敬祭于故相國興元節度贈司徒李公惟公之生樹名致節忠貞諒直天下所仰惟公之歿遭罹禍亂冤憤痛酷天下所知雖千萬其言終不能盡故茲真次但

寫私誠居易應進士時以鄙劣之文蒙公稱獎在翰林日以拙直之道蒙公扶持公雖佞公愚則受賜或中或外或合或離契闊綢繆三十餘載至於豆觴之會軒蓋之遊多奉光塵最承歡惠眷遇既深於常等痛憤實倍於衆情永決奈何長慟而已翱情兼中外分辱眷知繇以歲時積成交舊敢申薄奠庶鑒微衷嗚呼哀哉伏惟尚饗

祭微之文

維大和五年歲次己亥十月乙丑朔十日
辛巳中大夫守河南尹上柱國晉陵縣開
國男食邑三百戶賜紫金魚袋白居易以
清酌庶羞之奠敬祭于故相國鄂岳節度
使贈尚書右僕射元相微之惟公家積善
慶天鍾粹和生爲國禎出爲人瑞行業志
略政術文華四科全才一時獨步雖歷將
相未盡譽猷故風聲但樹於蕃方功利不
周於夷夏噫此蒼生之不大遇也在公豈

有所不足耶詩云淑人君子胡不萬年又
云如可贖兮人百其身此古人哀惜賢良
之懇辭也若情理憤痛過於斯者則號呼
壹鬱之不暇又安可勝言哉嗚呼微之貞
元季年始定交分行止通塞靡所不同金
石膠漆未足爲喻死生契闊者三十載歌
詩唱和者九百章播於人間今不復叙至
於爵祿患難之際寤寐憂思之間誓心同
歸交感悲一布在文翰今不重云唯近者

公拜左丞自越過洛醉別悲吒投我二詩
云君應恠我留連久我欲與君辭別難白
頭徒侶漸稀少明日恐君無此歡又曰自
識君來三度別這廻白盡老髭鬚戀君不
去君須會知得後迴相見無吟罷涕零執
手而去私揣其故中心惕然及公捐館於
鄂悲訃忽至一慟之後萬感交懷覆視前
篇詞意若此得非魄兆先知之乎無以繼
寄悲情作哀詞二首今載於是附真文

其一云八月涼風吹白幕寢門廊下哭微
之妻孥親友來相弔唯道皇天無所知其
二云文章卓犖生無敵風骨精靈歿有神
哭送咸陽北原上可能隨例作埃塵嗚呼
微之始以詩交終以詩訣絃筆兩絕其今
日乎嗚呼微之三界之間孰不生死四海
之內誰無交朋然以我爾之身爲終天之
別旣往者已矣未死者如何嗚呼微之六
十衰翁灰心血淚引酒再奠撫棺一呼佛

經云凡有業結無非因集與公緣會豈是
偶然多生已來幾離幾合既有今別寧無
後期公雖不歸我應繼往安有形去而影
在皮亡而毛存者乎嗚呼微之言盡於此
尚饗

唐故湖州長城縣令贈戶部侍郎博
陵崔府君神道碑銘 并序

公諱孚字某古太嶽胤也今博陵人也唐
虞之際因生爲姜姓暨周封齊分類曰崔

氏長源遠派大族清門珪組賢俊準繩濟
美斯崔氏所以繇千祀而甲百族也隋散
騎常侍諱洽公六代祖也唐冀州武強令
諱紹曾祖也監察御史諱預王父也常州
江陰令育皇考也公幼以門蔭子補太廟
齋郎初調授汝州葉縣尉再調改宋州單
父尉時天寶末盜起燕荆毒流梁宋屠城
殺吏如火燎原單父之民將墜塗炭公感
激奮發仗順興兵挫敗賊徒保全鄉縣拳

白雲六十一
十八
勇之旅歸之如雲方欲糾合貔虎毆誅蛇豕京觀群盜金湯一方本道節度使奇之將議上聞會有同事者爭公陰相傾奪公超然脫屣遂以旆行東游江淮安時俟命屬吳王出閣領鎮求才撫人常聞公名試以吏事遂表請爲宋城尉事舉移假漣水令賞緋魚袋縣政修轉常州錄事參軍糾察課成浙東採訪使聞之奏授越州餘姚令吏畏人悅歲未滿浙西採訪使知之奏

改湖州長城今長城之理又加於前二邑焉政成秩滿解印罷去優游自得獨善其身興元元年疾歿於宋大和五年遷葬於洛享年若干詔贈尚書戶部侍郎夫人隴西李氏追封岐國夫人皆從子貴也公爲人儀表魁梧氣槩倜儻負不羈之才慕非常之功始發軔於單父志立而功不就終稅駕於長城道行而位不達善慶所積實生司空司空諱弘禮公之幼子也以學發

身以文飾吏以幹蠱克家以忠壯許國典
十郡領二鎮再登東土追命上公雖天與
之才國與之位亦由公義方之訓輔而成
焉大丈夫貯蓄材術樹置功利鎡基富貴
焯燿家邦不當其身而得於後父析子荷
相去幾何嗚呼崔公何不足之有按國典
官五品已上墓廟得立碑又按喪葬令凡
諸贈官得同正官之制其孫彥防彥佐等
奉父命述祖德揭石于墓勒銘于碑銘曰

天無全功 賢無全福 既享天爵

難兼世祿 矯矯崔公 道積厥躬

大志長略 卷于懷中 黃綬遏寇

思奮奇功 銅印字人 躬行古風

才高位下 步闊塗窮 竟戢羽翮

不展心膂 天道有知 善積慶鍾

昭哉報施 其在司空

大唐泗州開元寺臨壇律德徐泗濠
三州僧正明遠大師塔碑銘 并序

娑婆世界中有釋迦如來出爲上首如來
滅後像法中或羅漢僧或菩薩僧在在處
處出爲上首佛道未喪間生其人故泗州
開元寺臨壇律德大師實一方上首也大
師譙郡鄆人世姓暴氏僧號明遠七歲依
本郡霈禪師出家十九從泗州靈穆律師
受具戒五夏通四分律俱舍論乃升講座
乃登戒壇元和元年衆請充當寺上座明
年官補爲本州僧正統十二部開元寺北

地二百步作講堂七間僧院六所淮泗間
地卑多雨潦歲有水害師與郡守蘇遇等
謀於沙湖西隙地創避水僧坊建門廊廳
堂厨廩二百間植松杉楠檉檜一萬本由
是僧與民無墊溺患旋屬災焚本寺寺殲
像滅僧潰者數年師與徐州節度使王侍
中有緣遂合願叶力再造寺宇乃請師爲
三郡僧正奏乞連置戒壇因其施利廓其
規度侍中又以家財萬計助而成之自殿

閣堂亭廊庖廩藏洎僧徒臧獲傭保馬牛
之舍凡二千若干百十間其中像設之儀
筭用之具一無闕者長慶五年春作大和
元年秋成輪奐莊嚴星環綦布如自地踊
若從天降供施無虛日鍾梵有常聲四衆
知歸萬人改觀於是增上慢者起敬種善
根者發心利喜饒益叵能具舉若非大師
於福智僧中而得第一若非侍中於敬信
人中亦爲第一則安能大作佛事而中興

像教者乎故如來所謂我滅後我法傳授
於弟子囑於大臣斯言信矣師以大和八
年十二月十九日齋時終於本寺本院是
月二十九日道俗衆萬輩恭敬悲泣備混
槃威儀遷全身歸于湖西塲塔遵本教而
奉先志也報年七十僧鵬五十有一始出
家訖于遷化志業行願道力化緣引而伸
之隨日廣大前後臨戒壇者八登律座者
十有五僧尼得度者三萬衆江淮行化者

四十年或疑是人如來所使羅漢菩薩吾
焉知之初大師以功德爲心旣成而化侍
中以撰錄見託未就而薨今按弟子僧僧
亮元素行狀序而銘之嗚呼所以滿大師
之願終侍中之志也銘曰

平地踊塔

多寶示現

險路化城

導師方便

繫我大師

亦有大願

像法是弘

塔廟是建

佛人交接

兩得相見

法有毗尼

衆有僧尼

承教於佛 得度於師 宣傳戒藏
振起律儀 四十餘載 勤而行之
福德如空 不可思議 緣合而來
功成而去 如性不動 色身無住
示有遷化 非實滅度 表塔勒銘
門人戀慕

東都十律大德長聖善寺鉢塔院主
智如和尚茶毗幢記

浮圖教有茶毗威儀事具涅槃經陀羅尼

門有佛頂呪功德事具尊勝經經文甚詳
此記不載今但載大師僧行佛事興建幢
義趣而已大師姓吉號智如絳郡正平人
自孩及童不飲酒不茹葷不食肉不兒戲
年十二授經於僧皎二十二受具戒於僧
晤學四分律於曇睿律師通楞伽思益心
要於法疑大師貞元中寺舉省選累補昭
成敬愛等五寺開法臨壇大德繇是行滯
高名滯重僧尼輩請以聖善寺勅置法寶

嚴持院處之居十年而法供無虛日律講
無虛月使疑者信墮者勤增上慢者退僧
風驟變佛事勃興實我師傳授誘誨之力
也大和八年十二月二十三日終於本院
報年八十六僧夏六十五明年正月十五
日合都城道俗萬數具涅槃儀移窆於龍
門祖師塔院又明年某月某日用闍維法
遷祔於奉先寺祖師塔西而建幢焉噫大
師自出家至即世前後講毗尼三十會度

白集六十
五十四
苾芻百千人兼律登壇施法行化者五十
五載而身相長大面相端嚴心不放逸口
無戲論四部瞻仰敬而畏之矧又以直心
坐道場以密行傳法藏爲東王城十大德
首爲南贍部八關戒師名冠萬僧利及百
衆所謂提智慧劍破煩惱賊搥無畏鼓降
內外魔凜乎佛庭之直臣鬱乎僧壇之大
將者也初師之將遷化也無病無惱晏坐
齋心領一童詣諸寺遇像致敬逢僧與遊

口雖不言心若默別後數日而化識者異
之及臨盡滅也告弟子言我歿後當依本
院先師遺法勿塔勿墳唯造佛頂尊勝陀
羅尼一幢寘吾茶毗之所吾形之化吾願
常在願依幢之塵之影利益一切衆生吾
願足矣今院主上首弟子振公洎傳法受
遺侍者弟子某等若干人合力建幢以畢
師志振輩以居易辱爲是院門徒者有年
矣又十年以還蒙師授八關齋戒見託爲


記附于真言蓋欲以奉本教而滿先願尋
往因而集來果也欲重此義以一偈贊之
偈云

幢功德甚大 師行願甚深
孰見如是幢 不發菩提心

白氏文集卷第六十



所
圖
書



不 許 複 製

NOT TO BE REPRODUCED

東京大学東洋文化研究所